

2024-mut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Akileraartarnermullu Naalakkersuisoq)**Oqaaseqaat:**

Naleqqamiit Naalakkersuisut qujaffiginiarpagut, nunata karsiata naatsorsuutaasa akuersissutigineqarnissaannik siunnersuutaannut.

Qularnanngilaq Kukkunersiornermut Ataatsimiititaliami sukumiisumik suliarineqarumaartoq.

Taamaattorli erseqqissaassutigisariakkat arlallit maluginiarneqassapput.

Siullermik, Aningaasanut Inatsisissamut atsioqataaffigineqartartoq piviusorlu qanoq isikkoqarnerseq.

Malunnarpoq oqarluartaarutit, nuannersut tusarlugit, atorluarneqartaraluarnera soorlu "Siammasissumik isumaqatigiinneq".

Ajoraluartumilli oqaatsit tamakku timitaqaratik, oqaatsit kusassakkat timitaqannginnerisa aanna ersiutaat.

Isumaqatigiinniarnermimi oqartoqarsinnaanngilaq, aaku partiit akornanni agguagassat, assersuutigalugu 10 mio. "Siammasissumik" isumaqatigiisummut ilaaniarussi, Naalakkersuisut 8mia aningaasartuutaat apeqquernagit peqataassaasi.

Taamaasereernerullu kingorna partiit naameersinnaanagit, allannguitissinnaanagit akuutinneqartarik. Aali atsioqataasut "siammasissumik suleqatigiinnissamik".

Aappaattut - inatsisit arlallit pilersinneqarnikuupput soorlulu naassaanngitsumik atasussanngorlugit ingerlatiinnarneqartut.

Taassuma kingunerivaa ullumikkumut eqqartugarput - nunatta karsiata imaarneqarnera.

Ukiummi ingerlanerani paasissutissat takkussuutsillugit, allannguisinnaassuseqannginnerup takuteqattaarpaa Naalakkersuisut isummatik allanngorsinnaanagit, tamassumalu kinguneralugu sineriammi inuerusaaneq ingerlanneqartup sakkortusarneqarnera.

Naleqqamiimmi maluginiarparput. Nunatta karsianut tunngassuteqartut arlallit taamaattussaannartut ingerlanneqartarnerat.

Sooruna nutarsarniarneqanngitsoq suleriuseq, Aningaasanut Inatsisip pilersinneqarneraniik ukioq kaangiusimaleriarnerni nunatta karsiata nalunaarutaata tungaanut.



Qanoq nunatta karsia politikerinut akisussaassuseqanngitsumik ingerlatsineranut qajannaarsinnaavarput?

Allaammi maanna piupput sanaartornerujussuit, inuiaqatigiinnut akisunerusumik ulluinnarsiuteqartitsisussanik, aali inatsimmi allaqqasok imminut akilersinnaassusillit kisimik inerteqqutaanngitsut, aningaasanik ukiorpassuarnut pituttuiniaraanni.

Politikerit iluareqqusaarutaata killeqannginnerisa kingunerivaat, inuiaat kalaallit artukkernerullugit killiffeqarneq.

Nunatta Karsiata nalunaarutaa itinerusumik pulaffiginngikkaluarlugu, ersarippoq Naalakkersuisut nipituuliutigisimasaat "aatsaat taamak ingerlalluartigaagut" ileqqaarinninnermik malitseqanngitsoq.

Inuiaat Kalaallit maanna sipaarniuteqarfiginiarlugit peqquneqarput pinngitsaalisummik utoqqalinersiutinik katersisussaataallutik. 2026-miit 10% annertutigilissalluni.

Naalakkersuisulli qiviarussigit aqutsinerat, katersarisimasaat? NUL!

Aali ingerlalluarnitsinnigooq.

Suleriutsit nutaterneqarnissaat kissaatigalugu, Naleqqamiit Kukkunersiornermut Ataatsimiititaliamukartipparput.